



A-N-T-I

**Aliansi Nasional Timor-Leste ba Tribunál Internasionál
(THE TIMOR-LESTE NATIONAL ALLIANCE FOR AN INTERNATIONAL TRIBUNAL)**

Tel: 77289241 or 77179655 / 77402231

e-mail: lanarra.del@gmail.com, atino@laohamutuk.org ka moniz@jsmp.minihub.org

Komunikadu da Imprensa

KOMEMORA LORON MASAKRE IGREIJA LIQUISA 5 – 6 ABRIL:

“Familia Vitima sira nafatin hela iha inserteza nia laran”

Loron ida tan komunidadade sira ho sarani hamutuk ho familia vitima sira sei komemora loron masakre Igreja Liquisa 5 – 6 Abril. Masakre ne'ebe akontese iha Abril 1999 hodi rezulta minimu ema 200 mak mate no lakon obrigatoriu no too ohin loron lahatene sira nia paradeiru.

Masakre Liquisa nian komete husi Polisia Brimob, Militar no Milisia Pro-Indonesia Besi Merah Putih (BMP) no autor sira ne'e ate agora sei nafatin goza impunidade no livre husi prosesu akontabilidade formal. Iha tinan 2012, eis Milisia Besi Merah Putih, Kondenadu Valentim Lavio, hetan kondenasau husi Tribunál Distrital Dili ba pena prizaun tinan 9 resin. Maibe ikus mai Valentim Lavio halai tiha ba Atambua-Indonesia no ate agora seidak iha mekanismu ruma atu lori hikas Valentim Lavio hodi kumpri pena ne'ebé nia hetan.

Alende masakre iha Liquisa, iha mos masakre balu ne'ebe Timorensen komemora iha fulan Abril nia laran mak hanesan masakre iha Cailaco (Maliana), ne'ebe rezulta ema minimu nain 7 mak hetan ezekuta husi militar no milisia pro-Indonesia. Akontesementu ne'e mosu iha loron 12 Abril iha tinan ne'ebe hanesan. Iha mos masakre boot seluk maka mosu iha residencia Sr. Manuel Crasacalao nian iha loron 17 de Abril, ne'ebe rezulta ema minimu nain 12 mak mate.

Iha tinan 2012, iha tempo Estadu Timor Leste apresenta ninia relatoriu Revizaun Perioduku Universal (RPU/UPR) konkorda ona no iha komitmentu atu implementa relatoriu ho nia rekomendasaun sira husi Konsellu Direitus Umanus ONU nian, liu liu atu adopta rekomendasaun husi Comisaun Akolhimentu, Verdade no Rekonsiliaun de Timor-Leste (CAVR) nian no Komisaun Verdade no Amizade (KVA) inklui aseleira hodi pasa lalais ezbosu lei kona-ba Esbosu Lei Reparasaun no Lei ba Institutu Memoria ne'ebé sai kaduka iha Parlamentu Nasionál. Nune'e mos sei halo nafatin esforsu ho objetivu atu promove lialoos, justisa, memoria no reparasaun ba violasaun grave direitus umanu ne'ebé komete entre 1974 – 1999.

Tuir ejizensia vítima no familia vítima sira ne'ebé legaliza iha rekomendasaun sira CAVR no KVA nian Estadu Timor Leste mos iha obrigasaun hodi asina no ratifika Konvensaun Internasional konaba Protesaun ba Ema Hotu husi Desaparesimentu Forsadu. Maibe infelizmente komitmentu sira husi Governo Timor-Leste sei namlele hela.

ANTI mos observa katak, dadaun ne'e iha Komisaun ida no familia vitima iha Liquisa mos rekoilha hela restus mortais sira hodi prepara atu lori ba iha Ossuario. Iha rekuilhamentu restus

mortais sira ne'e ANTI observa katak ladun iha komunikasaun diak entre komisaun ho parte familia vitima sira. ANTI mos hetan lamentasaun husi familia vitima balu katak la iha transparansia husi membru Komisaun sira ne'ebe rekoilha hela restus mortais sira. Iha rekoilamentu restus mortais sira ne'e mos ANTI preukupa tamba laiha involvimentu husi team forensic sira nune'e susar atu idenfika restus mortais sira. Pior liu tan iha fatin balu restus mortais sira husi mate isin nain tolu liu tau hamutuk deit hodi hatama iha kaixa ida nia laran.

Husi masakre hirak ne'e, ita hotu hatene katak sai kakutak nain ka autor prinispal ne'e mak Prabowo Subianto, Wiranto no selu-seluk tan. Hanesan ita akompania hamutuk, dadaun ne'e nudar figura ida ne'ebe mak importante atu avansa ba kandidatura eleisuan Prezidente da Republika nian. Husi tinan 1980 to'o 1998 Prabowo nudar Komandante Kostrad no Kopasus nia papel influensia tebes hodi dezeinha masakre sira ne'ebe mosu. Masakre sira ne'e mak masakre Craras-Viqueque ne'ebe kuinhesidu tebes ho naran "Kampung Janda" no masakre seluk mak insidente Santa Cruz 1991. Ohin, Prabowo Subianto awansa dadaun atu ba kompete iha eleisaun Prezidente nian iha Indonesia. Prabowo nafatin goza nia impunidade no sees husi prosesu akontabilidade formal. Etapa primeiru maka eleisaun ba Parlamentu Nasional Indonesia nian ne'ebe sei akontese iha Abril, iha loron balun ne'ebe tuir kedan ami nia komerasaun ba masakre ne'e.

Ho nune'e ANTI hakarak ezizi no apela:

1. Ba Estadu Timor Leste ho Indonesia atu fo prioridade ba implementasaun rekomedasaun final husi KVA liliu atu estabelese komisaun ba buka ema lakon tamba too ohin loron maske iha ona enkontru altu nivel (SOM) dala barak ona maibe seidak iha rezultadu konkretu hodi responde ba ezizensia familia vitima sira.
2. Ba Komunitade Internasional liliu ativista direitus umanus atu kontinua luta hodi kampanye no fo kunhsementu masimu ba povo Indonesia ho aktus krime kontra umanidade ne'ebe Prabowo komete iha Timor Leste, Maluku, Papua, Aceh no fatin sira seluk iha teritoria Indonesia atu evita nune'e aseguira autor kriminozu sira labele sai ukun hodi estraga tan voleres demokrasia no direitus uamanus.
3. ANTI mos husu ba Governo Timor Leste liuliu Komisaun ne'ebe rekoilha restus mortais sira iha Liquisa, Ainaro, Manatuto no distritu seluk atu involve team forensic nune'e bele ezamina no aseguira restus mortais sira nia identidade nune'e bele entrega ba iha familia refere.
4. ANTI husi ba Parlamentu Nasional atu re-agenda hodi debate esbosu Lei Reparasaun no Institutu Memoria ne'ebe oras ne'e dadaun iha Parlamentu Nasional.

Dili, 4 Abril 2014



Sisto dos Santos
Koordenadór Board ANTI